

wil ihm also ein ewige Kirche auß grosser Barm-  
herzigkeit vmb seines Sohns Jesu Christi willen  
samlen / das öffentliche ehrliche Versamblungen  
sind / darin ehliche Persohnen das Evangelium dem  
Volck fürtragen vnd die Sacrament reichē. Vnd  
ist der Sohn Gottes selb im Paradies dieser erste  
Prediger vnd Priester gewesen / vnd hernach da er  
Mensch wordē / zum Predig Ambt gesand vnd hat  
zuvor die Propheten vnd hernach die Aposteln ge-  
sandt / wie er spricht: Wie mich mein Vatter ge-  
sandt hat / also sende ich euch.

Vnd dieses sol also Jederzeit von allen rechten  
Lehrern die zum Ambt beruffen seint / verstanden  
werden. Der Sohn Gottes sendet sie vnd will  
kressftiglich durch das Evangelium wirken / vnd  
also ein ewige Kirche samlen.

Also spricht auch S. Paulus vom Ministerio  
Eph. 4. Er ist auffgefahren ꝛc. vnd gibt Gaben den  
Menschen / Apostelen / Propheten, Evangelisten,  
Hirten vnd Lehrer. Er ist vor vnd vor der ewige  
Priester vnd erhalter des Ministerij vnd erhelt zu  
allen Zeiten ein öffentliche ehrliche Versamblung.

Dar-